

Rais: Anwar tidak dijemput duta Turki
Malaysiakini.com
Jun 30, 2008

Datuk Seri Anwar Ibrahim, yang berlindung di kediaman Duta Turki di Kuala Lumpur, tidak pernah dijemput ke rumah diplomat tersebut dan ketua umum PKR itu juga tidak memohon perlindungan politik dari kerajaan Turki, kata Menteri Luar Datuk Seri Rais Yatim.

Rais berkata, duta itu menjelaskan Anwar datang ke rumahnya bukan kerana diundang dan beliau mahu penasihat Parti Keadilan Rakyat itu segera meninggalkan premis itu.

"Mereka bimbang kehadiran ini memberi isyarat yang tak betul. Kerajaan Malaysia terima penjelasan ini. Anwar berada di rumah duta itu bukan bagi mendapatkan perlindungan politik tetapi sebagai tetamu.

"Tempoh belum sampai 24 jam. Jika dia berada di situ lebih lama, kita harus ambil pendirian lain. Isu perlindungan politik tidak timbul," kata Rais selepas menemui Duta Turki ke Malaysia, Barlas Ozener, di Wisma Putra hari ini, demikian menurut laporan Bernama

Sabtu lalu, Mohd Saiful Bukhari Azlan, 23, seorang pembantu Anwar, membuat laporan polis mendakwa dia diliwat oleh mantan timbalan perdana menteri itu di sebuah kondominium di Damansara Heights pada 26 Jun lalu.

Pada awal pagi Ahad, Anwar berlindung di kediaman Duta Turki itu dengan alasan bimbang mengenai keselamatan kerana mendakwa mendapat ancaman bunuh awal minggu lalu.

Dalam blognya semalam, Anwar menyatakan beliau mendapat perlindungan di Kedutaan Turki setelah dijemput oleh duta negara itu.

Hormati undang-undang M'sia

Rais berkata Anwar berada di situ "atas dasar perikemanusiaan" tetapi "sampai bila, saya tak tahu."

Katanya Anwar tidak perlu bertindak sedemikian kerana beliau bukannya hendak ditangkap mengikut Akta Keselamatan Dalam Negeri atau Ordinan Darurat.

Rais berkata beliau telah memberitahu Duta Turki mengenai pendirian kerajaan Malaysia bahawa undang-undang negara ini perlu dihormati.

"Jika apa yang dilakukan oleh kedutaan ini dilakukan juga oleh kedutaan lain, banyak masalah akan timbul.

"Jika laporan dibuat terhadap seseorang dan orang itu enggan menghadapi tuduhan atau enggan membiarkan polis menyiasatnya, dia akan lari ke mana-mana kedutaan. Ini akan menjadikan undang-undang kita tidak berkesan," katanya.

Rais berkata Anwar menggunakan Kedutaan Turki untuk mendapatkan perhatian dan simpati masyarakat antarabangsa kerana soal ancaman kepada keselamatan dirinya tidak

timbul sama sekali.

"Duta itu mahu dia meninggalkan kawasan itu secepat mungkin kerana bimbang kehadirannya itu memberikan isyarat yang salah. Sehingga ini, polis tidak dibenarkan masuk untuk mendapatkan keterangan Anwar.

Jamin beri kerjasama

"Kawasan kedutaan adalah kawasan berkecuali dan kita menghormatinya. Kita akan tunggu sehingga dia keluar dalam sehari dua ini," katanya.

Ini merupakan pertama kali dalam sejarah negara ini seorang pemimpin politik tempatan mendapatkan perlindungan di sebuah kedutaan atas alasan keselamatan dirinya.

Rais berkata Duta Turki itu memberi jaminan tidak akan membenarkan Anwar berada di kediamannya untuk satu tempoh yang lama.

Rais berkata Malaysia tidak akan menghantar sebarang nota bantahan kepada Ankara berhubung kejadian itu.

Katanya Duta Turki memberi jaminan untuk bekerjasama dengan pihak berkuasa bagi menyelesaikan perkara itu.

Rais berharap Anwar akan keluar dari kedutaan itu bagi mempertahankan dirinya daripada tuduhan yang dibuat dalam laporan polis itu.

"Dia tak seharusnya menggunakan kedutaan untuk tujuan peribadinya," kata Rais.